

Rapport annual dal 2015/2016

L'onn da gestiun passà ha l'USC pudì ademplir sias incumbensas scu adina en maniera fidaivla. La Scolina rumantscha è etablida sin buna via ed il bus da scolina ha purtà ils uffants saun e salv a scolina e puspè a chasa. Il di da skis si Brambrüesch è stà in bel inscunter per ils uffants e lur famiglias e la festa da finiziun en l'iert da la Scolina è stà sco mintg'onn ina bun'ocasiun per ils geniturs, ils uffants e las mussadras dad emprender a s'enconuscher meglier en in circol patgific ed in ambient liber.

1. Suprastanza

La suprastanza è sa cumponida da nov quest'onn da gestiun: Flavia Buchli (presidenta), Robert Stecher (vicepresident), Beatrice Dosch (manischunza da bus), Robert Bissegger (cassier) e Petra Auer. A mes collegas da suprastanza engraziel jau cordialmain per lur engaschament en uffizi d'onur durant l'onn da gestiun! Miriam Derungs e Stefan Brühlhart-Caprez èn stads confirmads sco revisurs.

La radunanza generala ha gì lieu ils 28 settember dal 2015. In tema principal è stada la procedura da meds legals pendent a regard la decisiun negativa da la citad da Cuira concernent la finanziaziun dal viadi da scolina e scola. La procedura era da lez mument pendent avant la Dretgira administrativa dal chantun Grischun. La radunanza ha s'exprimì da recurrer avant il Tribunal federal en cas d'ina decisiun negativa, adattà confurmamain. La radunanza è vegnida enritgida tras la visita da scolastes e scolasts da la scola bilingua ed ils geniturs han gì la chaschun da far dumondas.

2. Scolina (bus da scolina)

L'onn da scolina 2015/2016 han frequentà en total 26 uffants la scolina bilingua rumantsch/tudestg en il Giacometti 1 tar dunna Martina Thöny (parzialmain remplazzada da dunna Angela Zimmermann) e tar dunna Dominique Philipp respectivamain en la scolina Barblan tar dunna Bettina Jordi. L'USC ha savì organisar in transport segir e per gronda part punctual per tut quels uffants che avevan basegn da vegnir purtads a la scolina bilingua. Da questa offerta han alura era fatg diever 20 uffants l'onn da scolina passà – uschè sco anc mai. Allegraivel è era stada la vendita dals spazis per sponsurs sin il bus da scolina. Questas entradas han furmà ina gronda part da las entradas da l'uniun, uschia che nus

avain pudì tegnair pli bassas las contribuziuns annualas per il diever dal bus da scolina

Durant l'onn da scolina 2015/2016 ha l'USC organisà duas ulteriuras occurrenzas. Damai che la citad da Cuira organisescha ussa in emna da skis per tut las scolinas, ha l'USC realisà per l'emprima giada in di da skis il mars 2016 si Brambrüesch. Ils uffants cun lur famiglias han passentà in di da naiv sulegliv ed in patgific di cuminaivel sin il culm chasan da Cuira. Ils 24 zercladur ha gì lieu la festa da curtin tradiziunala, che ha concludì l'onn da scolina. Ils uffants e lurs geniturs avevan da dumagnar insaquantas sfidas sportivas avant che pudair giudair ina liongia dal gril. In grazia fitg a las gidantras ed als gidanters, che sustegnan e pussibiliteschan uschia las occurrenzas da l'USC.

3. Rumantscholina

Adina il mardi en damaun sa scuntraran ils pli pitschens en la gruppa da gieus en il vegl ospital dal Fontana. Durant l'onn da gestiun 2015/2016 han 6 uffants durant mintgamai 3 uras giugà, zambregià, fatg biscuits, malegià, chantà e fatg marena ensemen. La pli pitschna ed anc adina unica canorta rumantscha da Cuira sa chatta gia il sisavel onn en l'edifizi dal vegl ospital dal Fontana. Cun Flurina Manetsch han ins chattà ina nova manadra da la Rumantscholina. Nus l'engraziain cordialmain per ses engaschament cun ils pitschens.

4. L'onn da gestiun

L'USC aveva fatg la dumonda a la citad da Cuira da surpigliar ils custs per il transport dals scolarets a la Scolina rumantscha, la citad da Cuira ha dentant refusà la dumonda. Cunter quai ha l'USC inoltrà il med legal a la dretgira administrativa dal chantun Grischun. Il 21 schaner ha approvà la dretgira administrativa il recurs da l'USC e ha decidì che la citad da Cuira stoppia pagar en avegnir il transport dals scolarets. I sa tractava damai d'ina decisiun da princip, pertge che quella n'aveva betg mo in effect sin il transport dals uffants da l'USC, mabain era sin il transport da tut ils scolarets che frequentan in'instrucziun bilingua en la citad da Cuira.

L'USC e la citad da Cuira han manà discussiuns suenter quella decisiun per realisar la sentenza il meglier pussaivel. La citad da Cuira ha decidì dad offerir danovamain per tut ils scolarets bilings ina ruta collectiva ed accompagnada dal Bus da Cuira per l'onn 2016/2017. Tut ils scolarets,

ch'han da far ina via lunga irresponsabla, pon profitar da questa offerta. Per ils uffants, che frequentan la scola primara bilingua, surpiglia la citad da Cuira in abunament per il bus da Cuira, che è valaivel per ils dis da scola. Las offertas correspundentas èn en funcziun dapi il cumanzament dal nov onn da scola ed èn gia sa cumprovadas fitg bain.

Per l'USC signifitgescha questa sentenza e la soluziun, che la citad da Cuira ha tschernì, in grond midament. Il bus da scolina na vegn betg pli gestiunà a partir da l'onn da scola 2016/2017. Per tegnair ils custs da mantegniment, parcagi etc. uschè bass sco pussaivel, ha l'USC vendì il bus da scolina. Il bus da scolina vegn ussa utilisà en in'otra scola per il transport da scolars. Uschia po l'USC ademplir las obligaziuns financialas anc avertas pertutgant il bus. La sistida dal traffic da bus tar l'USC ha già era consequenzas per las duas manischunzas dal bus, Beatrice Dosch e Pierina Bischofberger: Pierina Bischofberger vuless s'orientar en in'otra direcziun pertutgant la professiun, entant che Beatrice Dosch è vegnida engaschada tar il bus da Cuira e per nus èsi in grond plaschair ch'ella maina era vinavant ils scolarets en il gir collectiv a scolina.

5. Prospectiva

In dals temas principals da l'USC, q.v.d. il bus da scolina, è ussa reglà. La Rumantscholina vegn manada vinavant. L'USC resta era en avegnir in'uniun da quels geniturs, che han ina relaziun cul rumantsch en la citad da Cuira e che s'engaschan per il mantegniment e la promoziun da l'offerta da furmaziun bilingua en la citad da Cuira. Envers l'instituziun ch'è responsabla per la scola represchentain nus spezialmain era ils interess da quels uffants, respectivamain geniturs, ch'èn dependents d'in transport a la scolina ubain scola bilingua rumantsch - tudestg. Qua èsi era da menziunar la funcziun impurtanta e na da sutvalitar da la prescolina, che „recrutescha“ ils uffants per la scolina bilingua ed è damai in'impurtant element (part) en l'offerta da furmaziun rumantscha. Ella porscha ina contribuziun considerabla a las capacitads dals pli pitschens e ad in emprim pass en direcziun d'integrasiun sociala.

Era en avegnir essan nus dependents da geniturs activs e da la reclama a bucca per las purschidas da l'USC. Mo uschia èn garantids il funcziunament e l'existenza durabla da la Rumantscholina e Scolina bilingua a Cuira. Grazia fitg a vus tuts!

Cuira, settember 2016